

Дагъиста цадеш

Дагъистайзиб, Кавказлизиб, Россиялизиб, арагӀеб дунъяличиб-булан миллатуни-ургабси масъала челукъусили бетаурли саби. ЦацадехӀ миллатуни сари-ургар дижгурти анцӀбукунира къаршидиркули сари.

Аргъес гӀягӀнибиркур Дагъистайзир дахъал миллатуни лерниличила, гъарилла саби бегӀти мез, культура, тарих диъниличила. ХӀякъикъатличила лебтанилра, хаслира чеалкӀуси наслула вакилтани, багъес гӀягӀниси саби. Ил масъала пикрибирули, академик Х.М. Хасбулатов викӀусири: «Жявлил замана баили саби Дагъиста миллат лебси биъни багъес, нушала халкъани декӀар-декӀарти мезаначил гъайбикӀулихъалли, нуша ца миллат сарра. Ну къабуликес хӀейрус нушачир дахъал мезани лерни къияндешуни алкӀахъуси, тӀягӀямагарси шартӀ саби бикӀутачи. Иличи ургӀебли, дахъал мезани лернили, ДагъистанкӀун лебилра дунъяличи мешубиркахъули саби, биштӀаси дунъяличи, сунезибра бахъал халкъани узбиван уржили хӀербируси. Дагъистанланти цадехӀ мезличилцун гъайбикӀуси замана лябкъниличи ну вирхули ахӀенра, ва илгъуна замана бакӀили дигули ахӀенра. Мезани калахъесцун ахӀенну, гъатӀира гъаладяхӀ дашахъес хӀяжатбиркур. ИлдикӀун нушала халкъла давла сари. Дахъал журабардеш нуша гъаладяхӀ дашахъуси гӀиниз саби...»

ВегӀла миллат дигахъес, амма цархӀилтала убяхӀхӀебирахъес, хӀурматбирахъес дурхӀни руркъути саби. КъантӀли буралли, ГъазимяхӀяммад Юсуповла «Нургъби» бикӀуси хабарлизибси пикриличи кес гӀягӀнити саби дурхӀни: «Вайти-гӀяхӀти я миллат, я мез дирути ахӀен».